

«Il daner è il retg dal mund... e mida il cumportament»

DA BARBARA JANOM STEINER

■ **Nus tuts enconuschain il proverb** «Il daner è il retg dal mund». Constat quai? Ins po e dastga dubitar quai, ma ch'i ans plaschia u betg: Ils daners èn ina chaussa essenziala, els influenzeschan nossa vita e sveglian dumondas che commovan tuts. Ils daners èn in med impurtant per ordinar resp. per «garantir» ils affars dals umans e dals pajais. Gea, daners èn impurtants. Daners pon er midar il cumportament. Il pli tard dapi che jau sun ministra da finanzas da noss chantun sun jau daventada anc bler pli conscienta da l'impurtanza e da la pussanza dals daners. Dapi lura hai jau per exempel curiusamain tants amis ed enconuschents sco anc mai. L'interess na pertutga dentant betg primarmain mai sco persuna, mabain plitost mia funcziun, cunquai che tschertas personas

crain propi ch'i possia esser in avantatg d'enconuscher quella glieud ch'ha influenza sin decisiuns finanzialas.

Jau vegn a savair viver bain, cur che quest interess vegn a sa diminuir abruptamain la fin da l'onn, suenter mia extrada da la regenza. Lura na vegn jau er betg pli a stuair surpigliar ina rolla savens fitg difficila. Numnadamain la rolla da quella che ruina il gieu. Quant savens hai jau – suenter preschentaziuns euforicas, eloquintas e traglischantas d'uschenumnads projects visiunars – fatg las dumondas dischagreablas «...e quant custa tut quai?» u «...co e da tgi duai quai vegnir finanzià?», e lura la finala fatg las constataziuns dischillusiunantas che nus na pudain simplamain betg ans prestar quai, che las ristgas èn memia grondas u che las investiziuns n'èn betg persistentas. Ruinagieu! Da quai ma sun jau stada conscienta, e tuttina tutgi tar mia incumben-

sa da far questas dumondas; la finala sa tracti da meds finanzials publics, da daners che tut ils pajataglias han contribuì cun stenta e fadia. E fitg savens sa tracti da blers, fitg blers daners che duessan vegnir impundids en moda raschunaivla, persistente e cun responsabladad – natiralmain, ma tant pli sch'i n'èn betg ils agens daners.

En tut quests onns èsi displaschaivlamain adina puspè sa verifitgà ch'il cumportament resp. la prontezza da singulas personas da duvrar meds finanzials publics è bler pli lucca resp. bler pli gronda che sch'i sa tracta dals agens daners. Currius, sche daners n'èn betg il medem sco daners... Forsa ch'i vales la paina da far ponderaziuns en chaussa.

L'autura è cussegliera guvernativa e scheffa dal Departament da finanzas e vischnancas dal chantun Grischun

